

Tekao haapuàhaia maakau

TEXTE : TOTI TEIKIEHUPOKO POUR L'EXPOSITION « TIKI ».

Vai anaè ma io nā korohi mata āpoipoi, to ia tuna ihu hātea me nā puta ihu hatahata, to ia haha hātea me i tītahi kēkē kouvae i tītahi kēkē kouvae, tūia anaè i ūka o nā hatika pūhā vaevae motou me te nino kaūoo, pūtekeke, ua iò te Tiki he ata haatupakaia o Porinetia.

Ua haahia te tau hāoè i tihe mai a 19 hānere èhua i tēnei me KOKE (Gauguin) atii te tau poi patu ata no te tai hou mai me Picasso i ite i te hakatu hana atii aa.

I te ava nei, enāia i òto o te tau haè apuua taetae kakiu akoè a io te tau poi enā me ta ātou haina tōtahi atu tekaèkaè, o ia te mea i ūka òa. Ohia a, me he mea ua pā to ia òko, àè a e koàna pu ana mai. E aha òa ia ? Oinei, e haina tupe noa ! Me i te koèia o te tau haa kakiu a te tau tūuà, te avaiia me te tau manamana o te tau tiki ua kaò moū ana mai, e i te ava nei ua haatūhaèia tēnei tau tiki mèia i to ātou mutu.

Ua iò tēnei pona tekao «Tiki» e haahananui nei i to ia haaviviniia. Oia hoi, e tahi ana iho tiòhiia e tiki pu e ata haamāmaakauia i te ata o te ènana, i òto o tītahi hakatu tiòhiia, e ūè, te hakatu haatiòhiia me i kiu mai, o ia to mua ènana, te ata o te vāhana me te haa o te hana pēpena : Tiki.

Te haauia, e aha « Tiki ». Uia hanamāka me te hananui ta tēnei haateiteia e maki-maki nei e tuku mai i tītahi tau maakau haahuia. I te kātōia i te tau haaviviniia paotū no tēnei pona me te haahei ia ātou vāna e toū maakau : tekao kakiu, ata patuia, tiki haaataia no te ènana. E hakatu tiòhiia òto ana mai no tēnei ata me i te tumu mai no te tau motu o te henua Enana no te hakaiteia i tītahi haaviviniia o te tiki no te haapuàha mai i òto o ātou me «Tiki».

Tiki, te tiki te haaviviniia o to ia ata

Vāna e te tekao kakiu, ua timata te tau ènana i te taai i te tau tiki ma hope o te nohoia o Tiki i te Henua Enana. Ua hei oti tēnei kaveia tekao no te vetevete i to ia tūia io tēnei tau motu me te haatiòtohu na te matatatau i haate mai i te kōava o Tiki i vāveka o te ònohuu ma hā me te tekau ma


ònohuu ma ono o te tau papa Ètua i hope mai o nā Ètua tāuka, Atea me Atanua.

Me i kiu mai, àè te tau tiki he ata hakaia no te tau tupuna me i àò atia a no tahipito mèia i te hana māeka te haatata atu, vāna e to ātou taetaenui atii na te tau koika haamāmaakau haatiketike nei ia ātou, e tihe ātou io he tūia ètua kakiu, no te pāio henua akoè a kaavai henua, akoè a pāio ote motu. E haakaūoo ātou i to ātou mana no te kāvii mai i te tau huaa o te hakaiki me i òto o tītahi puke ènana. E puke pā, no tītahi tohua me to ia tau ènana i apuua, ia ātou te mana no te matavaaia atii no te ava kai nui. Na ātou e hakako mai i te tau haa tumu, e hakaite mai o ai tātou, to tātou oko me te tuāki atu i te tau mākaka.

E mataite, e haoka, e pahika, e hakatu haaataia, haaioi e tupuna, koè nui te tiki e ètua. No keina oti to ia hakatu kaneia ài huikē atii ana iho te avaiia iteia ana mai ma vāveka o te tau hakatu kāneia paotū, no atu e avai aa te tau hakatu, àè he tiki hakatu tahi.

Na te hopeia e toū poo, te upoko, te nino, te tau poo me àò o te nino, hahakatu to ātou hopehope i haate mai i to ia avaiia kanahau, he mea tiàtohu ua iò e hana haamauia. Ua tū anaè te upoko me nā mata kākaūoo i ūka òa o te ènana, te mana nui me te tiketike nui.

Ua iò te tekao no tiki e haatiòhiia i te hakatu o te tau keā i haatūia, atii me te tau keā ata ūè o ātou to mua haaataia. Me te tau tiki o Raivavae atii to Rapa nui, ua iò tiki oiaa ana iho te hakatu haaataia i te ènana te ata tiki kaèkaè oko nui. ♦



AGENCEUR OFFICIEL DU SALON DU HEIVA I TAHITI DEPUIS 2012



-  40 43 72 72
-  Magasin Redstore
-  redstore@mail.pf
-  redstore.pf

Tavararo - Route de la Stèle à FAA'A
Lundi au Vendredi de 9h à 17h
Samedi de 8h à 16h - Jours fériés de 8h à 12h